

DIKTAT KULIAH BERBICARA BAHASA BALI 1

**MATERI KULIAH MAHASISWA BIDANG ILMU
PENDIDIKAN BAHASA DAN SASTRA BALI
PADA SEMESTER I**



Oleh

Dr. I Nyoman Suwija, M.Hum., A.Ma.

NIP 19631231 198202 1 004

**PRODI PENDIDIKAN BAHASA INDONESIA DAN DAERAH
FAKULTAS PENDIDIKAN BAHASA DAN SENI
(IKIP) PGRI BALI**

DENPASAR

2011

PANGAKSAMA

Om Swastyastu.

Malarapan pasuécán Ida Sang Hyang Widhi Wasa, materi ajah ”Mabaos Basa Bali” puniki prasida kapuputang. Sasuratan puniki matetujon nyiagayang tuntunan sajeroning paplajahan basa lan sastra Bali, utaminipun ring widang kawagedan mabaos (*keterampilan berbicara*) manut katatwaning anggah-ungguhing basa Bali.

Para siswa miwah mahasiswa sané meled gelis waged mabaos Bali pacang prasida malajah ngraga antuk ngwacén saha ngresepang daging buku puniki duaning sampun tegep madaging teori anggah-ungguh basa Bali maweweh conto-conto bebaosan. Rauh mangkin buku utawi bahan ajah indik anggah-ungguh basa Bali arang pisan, punika mawinan titiang patut nyurat mangda wenten anggen pabuatan materi ajah ring Prodi Pendidikan Bahasa Indonesia lan Daerah, utamine ring konsentrasi Pendidikan Basa lan Sastra Bali.

Titiang patut ngangkenin mungguing daging buku puniki taler kantun akéh kakiranganipun. Titiang banget nunas paweweh saking para wagmi basa lan sastra Baliné, gumanti bénjangan sida paripurna. Kadi asapunika atur pangaksaman titiang, puputin titiang antuk parama santih.

Om Santih Santih Santih Om.

Sang sinurat,

DAGING BUKU

HALAMAN JUDUL	1
PANGAKSAMA	2
DAGING MATERI	3
BAB I. PAMAHBAH	4
1.1 Ngupapira Basa Bali	4
1.2 Kawagedan Mabasa Bali	6
BAB II ANGGAH-UNGGUH LENGKARA BASA BALI	10
2.1 Lengkara Alus Singgih	10
2.2 Lengkara Alus Madia	11
2.3 Lengkara Alus Sor	11
2.4 Lengkara Alus Mider	12
2.5 Lengkara Andap	12
2.6 Lengkara Kasar	13
2.7 Tatacara Nyantenang Anggah-ungguhing Lengkara	13
2.8 Nguji Pangresep	14
BAB III ANGGAH-UNGGUH BASA BALI	16
3.1 Basa Kasar	16
2.2 Basa Andap	19
2.3 Basa Madia	21
2.4 Basa Alus	25
3.5 Nguji Pangresep	29
BAB IV Pamuput	
4.1 Pacutetan	57
4.2 Pangapti	60

DAFTAR PUSTAKA

LAMPIRAN (POWER POINT)

BAB I

PAMAHBAH

1.1 Basa Bali Patut Rajegang

Sakadi sampun kawikanin, basa Bali wantah silih tunggil tetamian lelangit krama Baliné sané kantun katami tur kaupapira antuk para krama Baliné rauh mangkin. Yéning iketang ring widang budaya, basa Baliné sering kabaos pinaka akah miwah wahana kabudayaan Bali. Tegesipun, yéning pacang nelebin utawi nuréksain budaya Bali, wantah basa Bali sané pinih utama kanggén serana. Yéning pacang ngwedhar budaya Bali, taler basa Bali makaserana.

Malarapan pamineh kadi asapunika, basa Baliné nénten pisan dados kalaliang saha patut kapiara sareng sami mangda sayan limbak, paripurna, lan werdi. Puniki maiketan ring kawéntenan pidabdab krama Baliné sané maderbé organisasi adat utawi désa pakraman. Minakadi wénten désa pakraman, wénten banjar pakraman, wénten seka subak, seka santi, seka gong, seka arja, seka truni, miwah sané lianan. Makasami organisasi adat punika nganggén basa Bali yéning pét nglaksanayang paparuman (*rapat*).

Wénten taler daging pamineh sané maosang, duaning Bali ngumandelang séktor pariwisata, raris pariwisata Baliné wantah pariwisata budaya, patut budaya Baliné kaupapira becik-becik mangda nénten ja kantos rered. Budaya Baliné kasangga antuk aksara, basa, miwah sastra Bali. Sajeroning ngupapira budaya, duaning basa Bali pinaka akah budaya, patut taler basa Baliné kaupapira sareng sami. Sangkaning puniki raris Pemerintah Daerah Provinsi Bali ngamedalang Perda Bali No. 3 warsa 1992 indik *Pembinaan Bahasa, Aksara, dan Sastra Bali*.

Malarapan kawéntenan Perda saking Pemda Provinsi punika, Kepala Kantor Wilayah Departemen Pendidikan Provinsi Bali ngamedalang raris Surat Keputusan No.22/I.19C/Kep/I./1994. Surat Keputusan puniki negesang mungguing basa Baliné patut ranjegang pinaka *mata pelajaran muatan lokal wajib* saking tingkat SD rauh ring SMA/SMK. Puniki manut pisan ring pidabdab pemerintah pusaté sané negesang usaha ngupapira basa daerah pinaka basa ibu sané patut kaupapira makapanyangga basa nasional, sakadi kasinahang ring Penjelasan Pasal 36 UUD 1945.

Basa Bali, silih tunggil basa daérahé ring Indonésia sané kantun kaupapira becik-becik antuk parajanané sané kamulan wed wang (*etnis*) Bali. Manut kapatutan, basa Bali maderbé linggih pinaka basa ibu parajana Baliné. Sasampun alit-alité tama mabasa Bali ngawit pamijilan ring soang-soang kulawarga, wawu raris malajahin basa Indonesia sané kabaos basa nasional. Salanturnyané, kanggén negepin pangweruhan, maweweh raris ngawésayang basa asing, sanistané basa Inggris.

Saking riin rauh mangkin, basa Baliné kanggén pinaka serana mareraosan antuk parajana Baliné ring saluir widang kahuripan. Basa Bali kanggén ngawit saking sajeroning kulawarga miwah ring jaba kulawarga minakadi ring pasar-pasar, ring bebanjaran, ring désa pakraman, ring seka-seka adat minakadi seka truni, seka subak, seka gong, seka sasolahan, seka santi, miwah ring kantor lan sekolahan ri kala mabeaosan nénten patemon resmi nasional. Taler basa baliné kanggén ring seni sesolahan utawi tontonan minakadi ring drama tari, sendratari, drama gong, wayang kulit, arja, perémbon, miwah sané lianan.

Yéning uratiang basa Bali druéné, malarapan kawéntenan sasuratan sajeroning prasasti-prasasti miwah ring lontar-lontar, majanten prasida antuk maosang mungguing wénten basa Bali kuna miwah basa Bali anyar. Sané kabaos basa Bali kuna nénten ja tios, wantah basa Baliné sané pinih lawas wénten ring Bali, sané akéh kakeniang ring sasuratan prsasasti ngawit 804 Caka (882 Maséhi) rauh ring pamadegan Raja Anak Wungsu, duk warsa 994 Caka (1072 Maséhi).

Kasuén-suén, wawu raris kakeniang basa-basa Bali kapara utawi basa Bali lumrah sané sampun sué molihang panglimbak kantos kakeniang basa Bali sané anyar sakadi mangkin. Basa Baliné sané katami rauh mangkin, ketah maderbé sor singgih basa sané kawetuang antuk para angga pamaos, sapaos sané mabaos, sapaos sané kairing mabaos, saha sapaos sané kabaosang?

Wénten taler bebaosan sané mastikayang mungguing basa Baliné maderbé *variasi temporal*, *variasi regional*, miwah *variasi sosial*. Malarapan *variasi temporal*, basa Baliné kepah dados: (1) basa Bali Kuna utawi Bali Mula sané taler kabaos Bali Aga; (2) basa Bali Tengahan utawi Bali Kawi, miwah (3) basa Bali Kepara sané kabaos Bali baru, Bali modern miwah Bali Anyar.

Manut *variasi regional*, basa Baliné maderbé kalih dialék, inggih punika dialek Bali Aga (*dialek pegunungan*), miwah dialek Bali Dataran (*dialek umum/lumrah*). Dialek Bali Aga minakadi ring Désa Tenganan, Désa Timbrah, Désa Bugbug, Désa Tigawasa (ring Karangasem. Dialek Bali dataran minakadi ring Dénpasar, Badung, Tabanan, Gianyar, miwah sané lianan. Raris manut dimensi sosial, basa Baliné maderbé sistem anggah-ungguhing basa.

1.2 Mabaos Basa Bali

Palajahan aksara, basa, miwah sastra Bali madue papat kawagedan sané pacang kaulati, sané ring basa Indonesia kabaos *empat kompetensi berbahasa*. Makapapat kawagedan punika luihé: (1) kawagedan nyurat (*keterampilan menulis*), (2) kawagedan ngwacén (*keterampilan membaca*), (3) kawagedan miarsayang (*keterampilan menyimak*), (4) kawagedan mabaos (*keteterampilan berbicara*). Sapasira ugi sané malajahin basa lan sastra Bali, mangda pamuputné sida ngawésayang makapapat kawagedan punika.

Kawagedan mabaos wantah gumanti tetujon sané pinih utama antuk anaké sajeroning malajahin basa. Sapasira ja malajahin basa, pacang matetujon mangda wekasan waged mabaos. Nirguna pisan yéning malajahin basa Bali nénten kantos waged (*tidak terampil berbicara*) antuk basa Bali.

Akéh wénten téori indik mabebaosan sané ring basa Indonesia kabaos téori *berbicara*. Yéning baosang antuk basa Bali, mabaos inggih punika ngwedat daging pikayunan masrana antuk basa basita gumanti prasida karesepang antuk sang sané kairing mabaosan (sané mirengang). Yéning sang kairing mabaos sampun resep, raris sida nglanturang antuk panyawis basa-basita, puniki kabaos mabebaosan.

Mabebaosan sané kaptiang ring paplajahan basa Bali inggih punika mabaos basa pakraman (*bahasa resmi*) sané prasida nganutin tata titi utawi anggah-ungguhing mabasa Bali. Makasami parajanané madué kawagedan mabaos basa tutur (*lisan*) sajeroning pagubugan sarahina. Sakéwanten yéning kajudi mabaos sajeroning patemon resmi adat miwah agama, akéh sané nénten sumanggup utawi nénten percaya ring angga.

Sapunapi tatarané mangda sida numbuhan kapercayan angga? Majanten patut ngawikanin saluir pangweruhan, duaning mabaos wantah ngamedalang daging pikayunan

antuk basa tutur (*lisan*). Sang sané maderbé pangweruhan jangkep pacang digelis prasida ngwedat daging pikayunan antuk basa tutur (*lisan*). Iriki pacang macihna mungguing pikolihé miarsayang bebaosan pacang banget mawiguna. Anaké sané seneng miarsayang anak mabaosan, inggihan sajeroning patemon resmi, sajeroning média cétak miwah média éléktronik, pacang digelis waged mabaosan. Sampunang lali mungguing mabasa lisan miwah sasuratan wantah marupa kawagedan sané patut kapiurukin (*dilatih*). Manados pamaos miwah présénter patut kadasarin antuk mapaurukan sané becik.

Kawagedan mabaos puniki nénten dados pasahang ring kawagedan sané tiosan, inggihan kawagedan miarsayang, nyurat, miwah ngwacén. Kawagedan mabaos nénten pacang prasida nglimbak yéning nénten sering kalatih. Sewaliknya, yéning nénten kayun mauruk, napimalih setata maderbé pikayunan kimud utawi elek, majanten nénten pacang mapikenoh.

Mapaiketan ring indik kawagedan mabaos Bali, banget kaperihang indik pangweruhan kosa basa (*kosa kata*) basa Bali manut anggah-ungguhipun. Kosa basa punika sané kanggén pinaka serana ri kala ngwedat saluir daging pikayunan. Kirangnyané pangwésan kosa basa pacang banget mapuara méwéh ngwedat daging pikayunan (*ide-ide* utawi *gagasan*). Ring sor puniki pacang kaunggahang makudang-kudang wirasa indik mabaos (*berbicara*).

Tarigan (1986: 3-4) maosang kadi ring sor.

Berbicara adalah kemampuan yang dimiliki seseorang dalam mengucapkan bunyi-bunyi artikulasi atau kata-kata yang bertujuan untuk mengekspresikan, menyatakan serta menyampaikan pikiran, gagasan, dan perasaan seseorang. Berbicara meru-pakan sistem tanda yang audible (dapat didengar) dan visual (dapat dilihat) dengan memanfaatkan otot dan jaringan tubuh manusia untuk menyampaikan maksud, gagasan atau ide-ide yang dikombinasikan.

Yéning baosang indik wirasan *berbicara* ring ajeng antuk basa Bali, prasida kawedar kadi asapuniki.

Sané kaucap mabaos inggih punika kawagedan anaké jeroning ngucapang suara-suaran artikulasi utawi krana-krana sané kanggén ngwedat, niwakang miwah nyantenang saluir daging pikayunan miwah pangrasa. Mabaos marupa sistem niasa (*tanda*) sané dados kapirengang (*audibel*) saha dados kacingakin (*visual*) nganggén uat (*otot*) miwah jaringan anggan i manusa, kanggén ngwedat tetujon daging pikayunan.

Sajeroning *Kamus Besar Bahasa Indonesia* (2000: 248), *berbicara* adalah (1) *berkata; ber-cakap-cakap*; (2) *berbahasa atau melahirkan pendapat (dengan perkataan, tulisan, dan sebagainya), atau (3) berunding*. Tegesnyané, mabaos inggih punika (1) makruna; masaur-pitakén; (2) mabasa, ngraos utawi ngamedalang daging pikayun (antuk krana-krana, sasuratan, miwah sané lianan); taler (3) mapiguman.

Djiwandono (1996: 68) ngwewehin mungguing,

Dengan berbicara, seseorang berusaha mengungkap pikiran dan perasaannya kepada orang lain secara lisan. Tanpa berusaha untuk mengungkap dirinya, orang lain tidak akan mengetahui apa yang sedang dipikirkan dan dirasakan. Berbicara merupakan kegiatan berbahasa yang aktif produktif dari seorang pembicara yang memerlukan prakarsa nyata dalam penggunaan bahasa untuk dapat mengungkap diri secara lisan.

Terjemahannyané,

Malarapan galah mabaos, sang pamaos mausahaan ngwedat daging pikayunan saha pangrasa ring anaké tiosan antuk tutur. Yéning nénten mausahaan ngwedat anggannyané, anaké tiosan nénten pacang ngawikanin indik napi sané sedek kapikayunin lan karasayang. Mabaosan marupa pidabdab mabasa sané kabaos *aktif produktif* saking sang mabaos sané merihang pikarsa sekala ring nganggén basa sajeroning ngwedat angga antuk tutur.

Malarapan wirasan mabaos sané prasida katlatarang ring ajeng, prasida kacutetang mungguing mabaos inggih punika silih tinunggil kawagedan mabasa ngwedat suara-suara basa kanggén nyantenang unteng daging idep, pitutur, piteket, rincikan, ragragan, pangapti, utawi wirasa ring anaké tiosan.

Tetujon pidabdab mabaos wantah magenduhwirasa utawi *berkomunikasi* kanggén ngrauhang daging pikayunan. Sang mabaos patut ngawésayang tetuek (*makna*) saindik-indik wicara sané pacang kabaosang. Manut Tarigan (1986: 48), tetujon sang mabaos wénten petang soroh, luiripun:

- 1) kanggén ngibur sang mirengang (*menghibur*)
- 2) kanggén ngrauhang gatra, orti (*menginformasikan*)
- 3) kanggén nuldulin pikayunan (*menstimulasi*)
- 4) kanggén nglimbakang pangweruhan
(*memperluas pengetahuan*).

Malarapan paosan ring ajeng prasida kacutetang, mungguing pidabdab mabaosan ageng pisan wigunanipun sajeroning kahuripan jadmané sarahina-rahina. Sajeroning

magenduhwirasa ring kahuripan sosial, akéhan parajanané nganggén basa tutur (*lisan*) yéning imbangang ring mabasa sasuratan (*tulis*). Basa tutur kamulan danganan banget ring basa sasuratan, napimalih yéning masasuratan kria ilmiah. Punika mawinan anaké sané tamatan sekolah tinggi utawi para sujana ring widang pendidikan, akéhan waged mabasa lisan miwah sasuratan.

1.3 Wiwilan Anggah-ungguh Basa Bali

Basa Bali silih tunggil basa daerahé ring Indonésia sané maderbé wangun masor singgih. Ngawit warsa 1974, malarapan Pasamuhan Agung Basa Bali ring Singaraja, sor singgih basa Baliné kabaos *Anggah-ungguhing Basa Bali*. Sadurung punika, warsa 1957, 1970, 1984, sujana saking Welanda, J. Kersten, S.V.D. maosang sor-singgih basa Baliné antuk istilah *Warna-warna Bahasa Bali*. Tim Fakultas Sastra Universitas Udayana 1988/1989 maosang antuk istilah *Unda Usuk Bahasa Bali*, Nengah Tinggen 1984 rauh mangkin nganggén istilah *Sor Singgih Basa Bali*, Ida Bagus Udara Naryana (1983) maosang Anggah-ungguhing Basa Bali, sané ring basa Indonesia kabaos *Tingkat-tingkatan Bicara Bahasa Bali*.

Kawéntenan anggah-ungguhing basa sajeroning basa Bali sané katami saking riin saha kanton manggeh kantos mangkin mawit sangkaning wénten pabinayan linggih (*perbedaan kedudukan*) krama Baliné. Kawéntenan palapisan masyarakat Bali minakadi palapisan masyarakat Bali Purwa (*tradisional*) miwah masyarakat Bali Anyar (*modern*), puniki sané mawinan rauh mangkin iraga ring Bali mabaosan nganutin tata linggih sané kabaos masor singgih basa utawi mabaos manut tatwaning anggah-ungguh basa Bali. Patut iriki nguratiang, sapisira sané kairing mabaos? Sapisira sané kabaosang? Matiosan kruna-kruna sané patut anggén. Yéning ngraosang angga, patut mabasa alus sor, yéning maosang sang singgih, patut mabasa alus singgih. Taler yéning matur ring sang singgih mabasa alus singgih, yéning maosang kulawarga druéné patut taler sang mabaos ngasorang ipun nganggén basa alus sor.

Palapisan masyarakat Bali Purwa (*tradisional*) metu saking pamijilan utawi (*keturunan*). Wénten kramané mijil ring geria (ida pedanda, ida ayu, ida bagus), ring puri (ida cokorda, ida anaké agung), ring jeroan (dané gusti ayu, dané gusti agung, dané désak, déwa miwah ngakan, taler siluh, mekel). Wénten taler sané embas ring pacanggahan utawi umah sakadi i putu, i wayan, i madé, ni kadék, i nyoman, ni komang, miwah ni ketut. Sangkaning pamijilan krama Baliné kadi asapunika, wénten sorohing krama *tri wangsa*, miwah *wangsa jaba*.

1) Tri Wangsa

Sané kabaos *Tri Wangsa* inggih punika tetiga wangsané sané kabaos sang singgih, minakadi: *Brahmana*, (mijil ring geria) *Ksatria* (mijil ring puri) miwah *Wésia* (mijil ring jero).

2) Wangsa Jaba

Sané kabaos *Wangsa Jaba* utawi sang sor wantah sameton Baliné sané mawit saking *Sudra Wangsa* (jadmané sané embas ring pacanggahan/paumahan).

Salanturnyané, sajeroning masyarakat Bali Anyar (*modern*), sasampun parajanané madué swagina suang-suang, wénten krama: *prakanggé* utawi *prayayi*, miwah *parajana*.

1) Prakanggé/Prayayi

Prakanggé/prayayi wantah krama anyaré sané kabaos sang singgih, inggih punika krama Baliné sané kanggéanga ring jagaté pinaka guru wisésa (*pejabat*), minakadi: majikan, diréktur, manajer, réktor, dékan, dosén, bupati, camat, kepala dinas, guru (**pejabat dinas**); sulinggih, bendésa, kelian, pemangku, panyarikan, patengen, miwah **pejabat adat** lianan.

2) Parajana

Parajana inggih punika krama Bali anyaré sané kabaos sang sor, minakadi kramané sané madarbé swagina ngayahin utawi makarya pinaka paladén ring prakanggé/prayayiné. Upami: tukang sapu, sopir, tukang ketik surat, pegawai, tukang téh, mahasiswa, murid, buruh, babu/pembantu, miwah sané lianan.

Malarapan kawéntenan pabinayan linggih punika, metu tata krama mabaosan sané waluyané sampun pinaka *norma* utawi uger-uger sajeroning mabaos Bali, sakadi puniki.

- 1) **Wangsa Jaba** ri kala matur ring sang *Tri Wangsa* kapatutang nganggén basa alus. Upami:

I Madé → ring Ida Ayu → matur (Bs. Alus)
I Dolar → ring Gusti Patih → matur (Bs. Alus)

- 2) **Tri Wangsa** ri kala mabaos ring *Wangsa Jaba* kangkat mabaos basa andap (mabasa biasa, nénten alus) utawi mabasa madia. Upami:

Sang Prabu → ring I Dadab → mabaos (Bs. Andap)
Ida Bagus → ring I Madé → mabaos (Bs. Andap)

Pinaka conto kadi puniki.

1. I Madé matur ring Ida Ayu

Bebaosan (dialog) ring sor puniki nyinahang, I Madé pinaka terehan Sudra Wangsa, matur utawi mabasa alus majeng ring Ida Ayu. Sawaliknyané, Ida Ayu mabaos andap ring I Madé.

01. I Madé : “Ampura Ratu, wawu titiang tangkil.”
02. Ida Ayu : “Nah, Sing kéngkén Dé.”
03. I Madé : ”Sapunapi, durus makarya péper?”
04. Ida Ayu : “Payu, uli tuni iang ngantos Madé.”
05. I Madé : ”O... nggih? Titiang sampun muat buku.”
06. Ida Ayu : “O... nah, to suba malu anggon!”
07. I Madé : ”Ngiring wacén riin Ratu!”
08. Ida Ayu : “Nah, Madé suba malu maca!”
09. I Madé : ”Inggih, malih jebosan Ratu mikayunin!”
10. Ida Ayu : “Nah nah Dé. Lautang anaké!”
11. I Madé : ”Ratu sampun makta buku?”
12. Ida Ayu : “Suba. Iang suba meli di toko Setia Kawan.”
13. I Madé : ”O ... Aji kuda Ratu numbas?”
14. Ida Ayu : ”Mudah Dé, tuah aji duang dasa tali.”
15. I Madé : ”Inggih, titiang jagi numbas taler asiki.”

Ri kala ngraosang déwéknyané, I Madé patut nganggén alus sor upami ”*Titiang sampun muat buku kalih.*” Kruna *muat* rumanjing kruna alus sor. Ri kala I Madé nakénang Ida Ayu, ”*Ratu sampun makta buku?*” Puniki lengkara alus singgih, duaning indik Ida Ayu makta buku. Kruna *makta*, alus singgih kruna *muat*.

2. I Dolar Matur ring Dané Gusti Patih

Pateh kadi conto ba duur, yéning iriki, I Dolar pinaka parekan sané wit saking Sudra Wangsa, patut matur mabasa alus majeng ring dané gusti patih pinaka Tri Wangsa. Sawaliknyané, dané gusti patih kangkat mabaos andap ring I Dolar.

01. I Dolar : “Inggih, nawegang titiang Gusti. Duaning nembé puniki semeng pisan Gusti nauhin sikian titiang, nak wénten karya napi ring purti?”
02. Gusti Patih : “Cai Dolar. Nak ngudiang padidi men Cai tangkil? Nyaman Ciné I Pétruk dija?”
03. I Dolar : “Sisip titiang Gusti. Manahin titiang ipun sampun dumunan ka puri?”
04. Gusti Patih : “Suba ja orin Cai ia?”
05. I Dolar : “Sampun Gusti”.
06. Gusti Patih : “Tondén teka ia. Lan ajaka ka puri malu! Ditu antosang.”
07. I Dolar : “Inggih, titiang ngiring Gusti”.

Makanten ring conto ba duur, I Dolar ri kala ngraosang déwékipuné miwah nyamanipun (I Pétruk), ipun nganggén basa alus sor upami “*Sisip titiang Gusti. Manahin titiang ipun sampun dumunan ka puri?*” Kruna *manahin* miwah *ipun, titiang* rumanjing kruna alus sor. Gusti Patih mabasa andap ring I Dolar, upami “*Tondén teka ia. Lan ajaka ka puri malu! Ditu antosang.*”

- 3) *Parajana* (pegawé utawi anaké sané linggihnyané soran), ri kala matur ring sang maraga *prakanggé* utawi *prayayi* patut mabaos basa alus. Upami:

Sopir	→	ring Réktor	→	matur (Bs. Alus)
Pegawai	→	ring Bupati	→	matur (Bs. Alus)

- 4) *Prakanggé* utawi *prayayi*, ri kala mabaos ring *parajana* (sang sor), kangkat mabaos basa andap (basa biasa, *lepas hormat*) utawi mabasa madia. Upami:

Diréktor	→	ring nupékon	→	mabaos (Bs. Andap)
Majikan	→	ring buruh	→	mabaos (Bs. Andap).

Pinaka conto kadi puniki.

1. Sopir Matur ring Bapak Réktor

Iriki katurang imba baos sopir ring réktor. Sopir iriki pinaka sang sor sané kabaos parajana. Réktor pinaka sang singgih sané kabaos prakanggé. Duaning asapunika, sopir matur mabasa alus ring réktor, réktor mabaos andap utawi madia ring sopirnyané. Ngiring wacén conto ring sor puniki!

01. Sopir : “Pak, bénjang durus Bapak jagi ka Bangli?”
02. Pak Réktor : “Payu. Kéngkén?”
03. Sopir : ”Titiang nunas jinah anggén ngentosin olin mobil druéné”
04. Pak Réktor : “Nah nah. Aji kuda nganti oli?”
05. Sopir : ”Tigangatus kali Pak.”
06. Pak Réktor : “Men kéto ya, lantash umbah mobilé nah!”
07. Sopir : ”Inggih Pak. Nganggén oli plastik?”
08. Pak Réktor : “Nganggon...!”
09. Sopir : ”Yen kénten ja, kirang jinahé Pak”
10. Pak Réktor : “Buin akuda kuangan?”
11. Sopir : ”Malih nenem dasa tali Pak”.
12. Pak Réktor : ”Néh. Eda makelo nah!”
13. Sopir : ”Inggih Pak, suksma.”

Asapunila sopirné bapak réktor matur alus ring dané, raris bapak réktor dangan mabaos antuk basa sané andap.

2. Baos Sékpri ring Bupati

Ring sor puniki malih katur imba mabaos Bali pantaraning Bapak Bupati sareng Sekréтары pribadinnyané. Uratiang atur mabasa alus saking Sekréтары majeng ring Bapak Bupati, raris baos mabasa andap/madia saking Bapak Bupati ring sekretarisnyané.

01. Sékpri : “Ampura Bapak, bénjang titiang nunas izin, Titiang ngodalin”
02. Pak Bupati : “O... keto? Odalan dija?”
03. Sékpri : ”Ring pura kawitan titiangé nika Pak.”
04. Pak Bupati : “Dija to?”
05. Sékpri : ”Ring Karangasem.”
06. Pak Bupati : “Yé dadi joh?”
07. Sékpri : ”Inggih Pak. Doh nika ring Blatung”
08. Pak Bupati : “O... Rai soroh apa? Pasek?”
09. Sékpri : ”Titiang soroh dukuh sakti Pak.”
10. Pak Bupati : “O... patuh ya ajak kuernan bapaké.”
11. Sékpri : ”Kénten Pak? Ibuké saking napi?”.
12. Pak Bupati : ”Uli Pangkung Prabu Tabanan.”
13. Sékpri : ”O... drika sampun ring Pangkung Prabu, pura Siwan titiangé.”
14. Pak Bupati : ”Keto? Nah nah. Kudang wai Rai ngidih izin sing masuk?”
15. Sékpri : ”Bénjang manten arahina Pak.”
16. Pak Bupati : ”O nah nah. Bin puan masuk nah! Bapak kal rapim ka bukit.”
17. Sékpri : ”Inggih Pak. Suksma banget.”

Conto puniki nyinahang Luh Rai pinaka parajana (sekréтары pribadin) Pak Bupatiné patut mabasa alus ri kala ipun matur ring bapak bupati. Sawaliknyané, bapak bupati (pinaka prakanggé), kangkat dané mabasa andap ring Luh Rai.

BAB II ANGGAH-UNGGUH KRUNA BASA BALI

2.1 Pamilet Bebaosan

Sajeroning mabebaosan, janten pacang wénten para angga sané milet mabebaosan. Wénten sang mabaos (*si pembicara*), sang kairing mabaos (*lawan berbicara*), miwah sang sané kabaosang (*orang yang dibicarakan*). Malarapan punika, metu raris krana-krana pangentos utawi (*kata ganti orang*). Duaning basa Baliné maderbé sor-singgih, krana pangentos punika taler maéndahan manut linggih sang sané milet mabaosan.

2.1.1 Sang Mabaos

Ring basa Indonesia, sang mabaos puniki ketah kabaos pamaos, *orang yang berbicara, si pembicara* utawi *orang pertama (O-1)*. Duaning basa Baliné madué angga-ungguhing krana/basa, sang mabaos puniki wénten undanganipun kadi asapuniki!

1) Kasar : Aké.

Conto : (1) Ngudiang *aké* patang Iba?
(2) Mauled ban Iba basang *akéné*.

2) Andap : Icang, Iang, Raga, Ana, Bena, Kola, Gelah, Manira

Conto : (1) *Icang* sing nyidang milu, Cai dogén kema nah!
(2) Kéngkén, payu Beli meliang *iang* pulsa?
(3) *Raga* sing ada anak ngorahin, sing juari kema.
(4) Lamun enté sing teka, *ana* gén kal mragatang.
(5) Eda iba pangkah lakar bani tekén *bena* nah!
(6) Adi, Grantang, eda *Kola* kutanga Adi!
(7) Yul, sawiréh *Gelah* lakar luas ka alase, Cai nyen ngiringang *Gelah*!
(8) Kéngkén laadné pidan unduk ceningé ditu di mayapada? Nang tuturang tekén *Manira*!

3) Madia : Tiang

Conto : (1) Nggih Atu, *tiang* ampun ngajeng iwawu.
(2) Dados *tiang* iwangang Bapak?

4) Alus : Titiang

Conto : (1) Inggih, Ida-dané sareng sami, sadurung nglantur matur, lugrayang riin *titiang* nyinahang déwék!

(2) Ampura Ratu, wawu *titiang* prasida tangkil.

2.1.2 Sang Kairing Mabaos

Ring basa Indonesia, sang kairing mabaos puniki ketah kabaos pamiarsa, *orang yang diajak bicara, utawi lawan bicara, orang kedua (O-2)*. Ring basa Bali, taler maderbé anggah-ungguhing kruna kadi asapuniki.

1) Kasar : Iba.

Conto : (1) Ih, cicing *Iba*, dasar *Iba* jlema corah.
(2) Bungut *Ibané* mula gebuh, sing taén enduk.

2) Andap : Ci, Cai, Nyi, Nyai, Enté, Nani, Benya. Awaké.

Conto : (1) Dija *Ci* kuliah jani?
(2) Bapa lakar luas, *Cai* ngrunguang adiné jumah.
(3) *Nyi* ngajak adiné kas puskesmas?
(4) Men *Nyai* kéngkén? Sing lakar payu milu luas?
(5) Ah, mula dasar *Enté* jlema buduh.
(6) Nah, mai dengéngang matan *Naniné!*
(7) Mapan *Benya* ngoyong joh di gumin anaké, eda pesan pati nyombongang déwék!

3) Madia : Tu, Atu, Jeroné, Ragané.

Conto : (1) Dados mabusana dinas, jagi lunga kija *Tu*?
(2) *Atu* ampun naur SPP? Yén *ten* naur *ten* dados kocap sareng ujian!
(3) Ampura *tiang* matakén, *Ragané* saking napi?
(4) Nawegang *tiang* nunasang *Jeroné*?

4) Alus : Ratu, Cokorda, Déwa, Ida-dané, dll.

Conto : (1) *Ratu* jagi lunga kija rahinané mangkin?
(2) *Cokorda* sapunapi, sampun marayunan wawu?

(3) *Dewa Ayu*, icén ja *titiang* nyelang jinah, *titiang* lali muat jinah, dompét *titiangé* makutang!
(4) Inggih, kadi amunika *titian* prasida matur, sané mangkin galahé katur ring *Ida-dané!*

2.1.3 Sang Sané Kabaosang

Pamilet sané kaping tiga sajeroning mabaosan basa Bali kabaos Sang sané Kabaosang, *orang yang berbicara, orang ketiga (O-3)*. Ring sor puniki jagi katur saha kawewehin anggah-ungguhipun.

1) Kasar : Polonné, Cicingé, Bangsaté

- Conto : (1) Depang pang bangsa *polonné*.
(2) *Cicingé* totonan nidik buah gedangé.
(3) Aah, eda guguna *bangsaté* totonan!

2) Andap : Ia, I Mémé, I Ketut, msl.

- Conto : (1) *Ia* tusing nyidang koné teka dinané jani.
(2) Kema suba majalan malali ajak *i mémé!*
(3) *I Ketut* gelem jani, sing nyidang magagé.

3) Madia : Raganné.

- Conto : (1) *Raganné* nénten jagi ngajin kocap mangkin.
(2) *Raganné* sané maosang kénten ring titiang.

4) Alus : Ida, Dané, Ipun.

- Conto : (1) *Ida* kantun sungkan mangkin, lé dangang titiang sané jagi matur ring sameton sareng sami..
(2) Bapak Dékan nénten prasida rauh mangkin, *dané* kantun ring Jakarta.
(3) Adin titiangé jagi nagingin mangkin, *ipun* kantun ring pamargi.

2.2 Anggah-ungguh Krana Basa Bali

Malarapan kawéntenan linggih krama Baliné sané matios-tiosan kadi kabaos ring ajeng, punika sané mawinan krana-krana basa Baliné mawirasa matios-tiosan. Manut wirasannyané, krana-krana basa Baliné kapah dados kalih soroh, inggih punika *krana alus* miwah *nénten alus*.

1) Krana alus

Krana alus puniki saluir krana basa Baliné sané mawirasa alus, inggihan sané kanggén nyinggihang utawi ngasorang. Krana-krana sané mawirasa alus puniki wénten patang soroh kadi ring sor puniki.

- a) Krana alus mider (Ami)
- b) Krana alus madia (Ama)
- c) Krana alus singgih (Asi)
- d) Krana alus sor (Aso)

2) Krana nénten alus

Sajaba krana-krana sané mawirasa alus, wénten taler krana sané mawirasa nénten alus. Yéning dumun, krana-krana sané nénten alus puniki kabaos krana *lepas*

hormat. Sané ngranjing sorohing kruna nénten alus puniki wénten tigang soroh, luihipun:

- a) Kruna andap (kruna biasa, maderbé wangun alus)
- b) Kruna mider (kruna biasa, nénten maderbé wangun alus)
- c) Kruna kasar (kruna sané mawirasa kaon).

Soang-soang kruna punika pacang katlatarang jengkep maweweh contonnyané ring sor puniki.

2.2.1 Kruna Alus Mider (Ami)

Kruna alus mider inggih punika kruna basa Baliné sané mawirasa alus, madué wiguna kekalih, dados kanggén nyinggihang sang singgih, miwah kanggén ngesorang sang sor. Tiosan ring punika kruna alus mider pastika maderbé wangun andap (Suasta, 1997: 26). Kruna-kruna sané macétak tebel tur séndéh ring sor, pinaka conto kruna alus mider (Ami).

- 1) Ida Cokorda *sampun rauh saking Jawi*. (Asi)
- 2) Bapak titiang *sampun rauh saking Jawi*. (Aso)
- 3) Titiang *nénten uning ring wénten karya*. (Aso)
- 4) Dané jero mangku *nénten uning ring wénten karya*. (Asi)

Sajeroning lengkara (1) ba duur, makanten pisan wénten papat kruna sané maderbé wirasa alus mider inggih punika:

- kruna *sampun*, - kruna *rauh*,
- kruna *saking* - kruna *Jawi*.

Sané mawinan makapapat kruna punika dados kabaos kruna alus mider duaning dados kanggén ring lengkara Asi (kadi ring lengkara no. 1), taler dados kanggén ring lengkara Aso (kadi no. 2).

Sajaba punika, maka papat kruna Ami punika maderbé wangun andap. Kruna *rauh* andapnyané *teka*; kruna *sampun* andapnyané *suba*, kruna *saking* andapnyané *uli*; kruna *Jawi* andapnyané *Jawa*. Puniki taler sané mawinan makapapat kruna punika mawasta kruna alus mider.

Asapunika taler indik kruna *nénten*, *uning*, *ring*, *wénten*, miwah *karya*. Sami puniki rumanjing kruna *alus mider* riantuk dados kanggén nyinggihang miwah ngasorang. Upami:

- 1) Ida *nénten sareng*, titiang *nénten sareng*, dané *nénten sareng*, ipun *nénten sareng*, Luh Rai *nénten sareng*, Gusti Ayu *nénten sareng* (Sami punika patut).

- 2) Dané *sampun makarya*, ida *sampun makarya*, ipun *sampun makarya*, I Madé Lara *sampun makarya*, Mekeleé istri *sampun makarya*, Nang Klencéng *sampun makarya*. Sami taler patut.

Conto kruna **alus mider** tiosan:

No.	Kr. Andap	Kr. Ami	Kr. BI
1	nawang	uning	tahu
2	engsap	lali	lupa
3	inget	éling	ingat
4	suba	sampun	sudah
5	nyemak	ngambil	mengambil
6	meli	numbas	membeli
7	ngadep	ngadol	menjual
8	sanget	banget	keras

Conto kruna alus Ami mawangun lengkara:

- 1) Ampura ping banget, titiang nénten *uning*. Ratu *uning*?
- 2) Ratu pasti *lali* ring titiang nggih? Titiang nénten naenan *lali*.
- 3) Titiang kantun *éling* ring Ratu. Rabin Iratuné *éling* taler ring titiang.
- 4) Ida duka *banget* mangkin, bapak titiangé taler *banget* pedih.
- 5) Luh Rai *ngadol* kain, Ratu *ngadol* napi ring pasar Kodok?
- 6) Titiang *nénten* sareng, Ida Ayu *nénten* taler sareng.
- 7) Ida Cokorda *wénten* drika? Bapak titiangé ten *wénten*.
- 8) Titiang *sampun naur* ring bendahara sekolahané.

2.2.2 Kruna Alus Madia (Ama)

Kruna alus madia (Ama) inggih punika kruna-kruna sané rasa basannyané magenah ring pantaraning alus singgih (Asi) miwah alus sor (Aso). Kruna alus madia puniki makanten pinaka *variasi* kruna alus tiosan (Bagus, 1979: 179). Tiosan ring punika, kamulan wénten kruna-kruna basa Baliné sané rasa basanipun *alus madia*, alus sané ring tengah-tengah, utawi kirang becik yéning anggén mabasa sané alus.

Uratiang conto ring sor!

- 1) *Tiang nika* ngelah.
- 2) *Nggih tiang ampun* nunas i wawu.
- 3) Ipun *ten* wénten *drika*.
- 4) *Niki* sira nuénang?

- 5) *Ampunang* ambila *nika* Tu!
- 6) *Tiang* ja muat *nika nggih*!
- 7) *Ampun* ya *kénten* gelisin anaké meriki!
- 8) *Atu ten* sareng ngajin drika?

Makasami kruna sané macétek tebel tur séndéh punika (*tiang, nika, nggih, ampun, ten, drika, niki*) wantah conto kruna alus madia. Uratiang malih conto-conto ring sor! Yéning kruna-kruna puniki kanggén mabaosan, bebaosané pacang manados *basa madia*.

No.	Kr.Andap	Kr.Ama	Kr.Ami	Kr.BI
1	ené	niki	puniki	ini
2	ento	nika	punika	itu
3	suba	ampun	sampun	sudah
4	iang	tiang	titiang	saya, hamba
5	nah	nggih	inggih	ya
6	kéto	kénten	sapnika	begitu
7	tusing	ten	nénten	tidak
8	dini	driki	iriki	di sini
9	-	atu	ratu	anda
10	busan	wawu	diwawu	tadi

Conto mawangun lengkara:

- 1) Ampunang *nika* ambila, *niki* wawu dados ambil!
- 2) *Nika* druén Atuné, *niki* tiang ngelah.
- 3) Atu *ampun* polih ka Art Centre? Tiang durung merika.
- 4) *Nggih* Atu, malih jebosan tiang jagi merika.
- 5) *Kénten* ipun ngraos ring tiang ibi sandé.
- 6) Tiang *ten* sareng merika nggih, ida gén merika!
- 7) *Driki* malinggih dumun, ampunang *drika* majujuk!
- 8) Dija mangkin *Atu* kuliah? Kari S1, napi ampun S2?

2.2.3 Kruna Alus Singgih (Asi)

Kruna-kruna alus sané kanggén nyinggihang sang sané patut ka- singgihang kawastanin kruna alus singgih. Binanipun ring kruna Ami, Kruna Asi puniki pastika maderbé wangun andap, taler maderbé wangun alus sor (Aso). Upami Kruna Asi

marayunan (*makan*), maderbé wangun Andap (*madaar*), taler maderbé wangun alus sor (*nunas*) utawi (*ngajeng*).

Ring buku *Kamus Anggah-ungguhing Basa Bali* (Suwija, 2008) sampun kaunggahang krana-krana basa Baliné sané maderbé wangun Asi miwah Aso akéhnyané 266 (satak nemdasa nem) krana. Krana-krana sané macetak tebal tur séndéh, ring sor, makasami conto krana alus singgih.

- 1) Rabin-Idané sampun *mobot* mangkin.
- 2) Okan Dané sané istri *maparab* Gusti Ayu Klatir.
- 3) *Praragan* Ratu rauh meriki?
- 4) Bapak wénten *nyingakin* bapan titiangé?
- 5) Malih pidan iratu jagi *mantuk* ka Karangasem?
- 6) Sira sujatiné *peséngan* rabinidané?
- 7) Ida Peranda nénten kayun *marayunan*.
- 8) Sapasira *pasengan rakan* Iratuné sané makarya ring Kuta?

Conto-conto Krana Alus Singgih kadi ring sor!

No.	Kr.Andap	Kr.Asi	Kr.Aso	Kr.BI
1	mati	séda	padem	meninggal
2	beling	mobot	abot	hamil
3	ia	ida, dané	ipun	ia
4	nepukin	manggihin	ngantenin	melihat
5	madan	mapeséngan	mawasta	bernama
6	padidi	praragan	néwek	sendiri
7	sirep	merem	masare	tidur
8	panak	oka	pianak	anak
9	madaar	marayunan	ngajeng	makan
10	meju	makoratan	makebotan	berak

Conto lengkara Asi tiosan:

- 1) *Tedun* Ida Anaké Agung, raris Ida *makoratan*.
- 2) Sampun kudang diri *okan* Gustiné *madué oka*?
- 3) Ida Peranda sampun *lebar* kocap ring rumah sakit.
- 4) I Gusti Ngurah Rai *lina* ring perang Puputan Margarana.
- 5) Ida biang lingsir sampun *makolem* ring *pasarén* baler.
- 6) Sampun Ida biang kocap sané *ngicén* ipun jinah.
- 7) Aji kuda ratu numbas *kuaca*?
- 8) Ratu nganggén *kasna* min napi ples punika?

2.2.4 Kruna Alus Sor (Aso)

Kruna alus sor inggih punika kruna-kruna basa Baliné sané mawirasa alus, kanggén ngasorang raga utawi ngasorang anaké tiosan sané linggihnyané sor utawi andap. Dadosnyané, sané pacang mabasa alus sor ring pambyaran, makasami krama Baliné sané ngangken angga pinaka sang sor jeroning mabaosan. Sané macétek tebel ring sor, conto kruna alus sor!

- 1) Jantos jebos titiang jagi *mabanyu* riin!
- 2) Banggayang Ratu, titiang jagi *néwék tangkil* ka geria!
- 3) Titiang *mawasta* I Wayan Mudara.
- 4) Asu druéné sampun *neda*?
- 5) Ipun sampun dumunan *padem*.
- 6) Mén Sunari raris sahasa *mademang* radio.
- 7) Adin titiangé durung *maderbé* kurenan rauh mangkin.
- 8) Titiang durung polih *mapajar* ring adi titiangé.
- 9) Dibi titiang sampun *matur* ring Bapak Gubernur Bali.
- 10) Ratu, *icén* ja titiang nyelang jinah ayuta kémanten!

Makadi conto kruna Alus Sor tiosan:

No.	Kr.Andap	Kr.Aso	Kr.Asi	Kr.BI
1	keneh	manah	pikayun	pikiran
2	gelem	sengkaon	sungkan	sakit
3	ban	antuk	olih	oleh
4	awak	déwék	angga	diri
5	ngraos	matur	mawecana	berbicara
6	maang	ngaturin	ngicén	memberi
7	nyak	arsa/kayun	misadia	mau
8	marengin	ngiringin	nyarengin	mengikuti
9	ngaba	muat	makta	membawa
10	ngenceh	mabanyu	mawarih	kencing

Conto lengkara tiosan:

- 1) Titiang nénten *miragi* orti, Ratu wénten mireng?
- 2) Buku punika kasurat *antuk* Pak Nyoman Suwija.
- 3) Inggih, sampun titiang sané *ngaturang* jinahé ka puri.
- 4) Ida dané sinamian, sadurung titiang nglanturang *matur*, lugrayang titiang nyinahang *déwék*!

- 5) Titiang *mawasta* Nyoman Suwija, titiang *embas* ring Désa Sobangan, duk tanggal 31 Désémber 1963.
- 6) Mémén titiangé sampun sué pisan *sinengkaon*, sampun akéh nelasang jinah ring rumah sakit.
- 7) *Garjita* dahat *manah* titiangé semengé mangkin riantuk sampun kapaica galah matur ring Ida-dané sinamian.
- 8) Ipun labuh negakin motor, rauh mangkin *buntutipuné* kari magip riantuk walungnyané elung.

2.2.5 Kruna Mider

Wirasan *kruna mider* yéning imbangang ring *kruna alus mider* (Ami) sering ngwetuang pikayunan sané bingung. Sané mawinan asapunika, duaning inggian kruna mider miwah kruna alus mider, makalalih dados kanggén nyinggihang, taler dados kanggén ngasorang. Pabinayannyané, kruna alus mider maderbé wangun andap, nanging kruna mider nénten maderbé wangun tiosan.

Dadosnyané, kruna mider inggih punika kruna-kruna basa Baliné sané maderbé wangun wantah asiki, nénten maderbé wangun alus singgih, alus sor, utawi alus mider, taler nénten maderbé wangun tiosan, mawinan ipun dados maideran sajeroning bebaosan.

Uratiang conto ring sor!

- 1) Ida kantun ka *toko* numbas *karpét*.
- 2) Ratu, nénten purun titiang, asu druéné *galak* pisan.
- 3) Mangkin sampun arang anak mirengang *radio*.
- 4) Ratu jagi lunga *kija*?
- 5) Titiang kénkéna nunas *arit* druén Ida Aji Ngurahé.
- 6) Buah sumagané ring Kintamani becik *manis-manis*.
- 7) Ring dija Cokorda numbas *cét tembok*?
- 8) Titiang lali muat *dompét*, sami jinah titiangé drika.

Pinaka conto Kruna Mider tiosan, sakadi ring sor.

No.	Kr.Andap	Kr.Mider	Kr.BI
1	kija	kija	ke mana
2	nyongkok	nyongkok	jongkok
3	spidol	spidol	spidol
4	séndéh	séndéh	miring
5	sepatu	sepatu	sepatu
6	bunter	bunter	bulat
7	tas	tas	Tas

8	HP	HP	HP
9	dompét	dompét	dumpet
10	kursi	kursi	kursi
11	kunci	kunci	kunci
12	buku	buku	buku

Conto lengkara madaging kruna mider tiosan:

- 1) Ida Ayu, sampunang drika *nyongkok*, tunguné akéh drika.
- 2) Gusti Ngurah, sayuakti Gusti madué *buku* pupulan pidarta?
- 3) Sami ruangan kuliahé ring kampus sampun madaging *LCD*.
- 4) Ratu jagi lunga kija makta *koper* ageng pisan? Ten *baat*?
- 5) Dija wénten tukang *sol sepatu* driki Desak?
- 6) Dados mawali malih ayam druéné, ten *galak* ring klecan?
- 7) Dija Ratu numbas *dompét* becik pisan?
- 8) Gedung SMK Bali Déwatané makasami malanté *granit*.

2.2.6 Kruna Andap

Duké riin, kruna andapé puniki kawastanin kruna *lepas hormat* utawi kruna kapara. Kruna andap inggih punika kruna-kruna sané rasa basannyané andap (éndép), nénten alus miwah nénten kasar. Kruna-kruna puniki kanggén ngwangun lengkara-lengkara andap. Kanggén mabaos antuk anaké sané sasamén wangsa, sasamén linggih. Sajaba punika, kruna-kruna andap puniki sasampun mawangun lengkara, dados kanggén mabaos antuk sang singgih (*golongan terhormat*) ring sang sor (*golongan penghormat*).

Wangun kruna andapé puniki masaih ring kruna mider. Pabinanipun, yéning kruna mider nénten pisan maderbé wangun alus, nanging kruna andap maderbé wangun alus. Upami kruna “*kija*” (mider) nénten wénten alusipun. Matiosan ring kruna “*kaja*” (andap), maderbé kruna alus *kaler*.

Kruna *kija* dados anggén ring baos andap, dados anggén ring baos alus singgih, dados anggén ring alus sor, dados taler anggén ring basa kasar.

Upami: 1) Ratu jagi lunga *kija*?

2) Bapak lakar *kija*?

3) Ia *kija* kadén Luh Rai tusang maorahan?

4) *Kija* ja keneh Ceningé jani, lautang!

5) *Kija* kémanten Ratu jagi lunga, titiang misadia jagi ngiringang.

6) Ih Ciring, *kija* dogén palalin Ibané uli ibi ah?

Matiosan ring kruna *kaja* (andap), duaning ipun maderbé wangun alus *kalér*. Kruna andap *kaja* wantah kanggén mabaos andap utawi kasar, yéning kruna *kalér* (Ami) wantah dados kanggén ring basa alus. Upami:

- 1) Simané dini malénan ajak jumah *kaja*.
- 2) Sapunapi mangkin simakramané *kaler*, Ratu?
- 3) Bapa teka uli *kaja* busan dini.
- 4) Cokorda rauh saking *kaler* napi ké rauh saking kangin?

Conto Kruna Andap ring lengkara tiosan:

- 1) *Luh, jemakang bapa rokoné di duur* mejané!
- 2) *Kéngkén, cai lakar milu kema?*
- 3) *Nyén ja adané* artisé *ané ngaé* vidio porno *ento?*
- 4) *Apa* ké kerek-kerek *ngejohang?*
- 5) *Apa* ke jangkrik ngecik *duur gunungé?*

Kruna-kruna sané macetak tebel tur séndéh, (*luh, jemakang, bapa, rokoné, kéngkén, cai, lakar, milu, kema, nyén, adané, ané, ngaé, ento, apa, ngejohang*), makasami conto kruna Andap, sané tiosan sakadi (*méjané*) conto kruna Mider, duaning nénten maderbé wangun alus. Ring sor kaunggahang malih conto-conto kruna Andap.

No.	Kr.Andap	Kr.Asi	Kr. Aso	Kr.BI-nya
1	nyén	sisapasira	sira	siapa
2	buin	malih	malih	lagi
3	gumi	jagat	jagat	bumi
4	sinah	janten	janten	tentu
5	aksama	ampura	ampura	maaf
6	kema	merika	merika	ke sana
7	mara	wawu	wawu	baru
8	ngigel	masolah	masolah	menari
9	maréré	mararéan	masandekan	istirahat
10	suwud	wusan	wusan	berhenti

Conto lengkara madaging kruna andap tiosan:

- 1) Saja Luh *suba* madaar busan? Iang nak *suba* masi.
- 2) Kija kadén uli tuni, *mara* teka mai.
- 3) Kema *aba* jep motor adiné ka bingkil! Bedah koné baané.
- 4) Yen ditu ajaka nginep, dija koné baanga *sirep?*
- 5) *Eda* pesan nyen telat mai nah! Apang tusing lek atiné.
- 6) Kema *madaar* malu, bin jahan lakar ajak beli magambel.

- 7) Yen tuturanga tekén guruné, melahang anaké *ningehang*!
- 8) Men sing idup yéh PAM-é, dija men Rai *manjus*?

2.2.7 Kruna Kasar

Kruna kasar inggih punika kruna basa Baliné sané rasa basannyané kaon. Kruna-kruna kasar puniki kanggén ngwangun bebaosan kasar. Punika mawinan kruna kasar punika ketah kanggén mabaos ri sedek brangti, ri kalaning marebat utawi mamisuh. Sajeroning mabebaosan, kruna-kruna kasaré puniki pinaka unteng ngwangun lengkara-lengkara kasar, sané pinaka dasar ngwangun basa kasar. Conto kruna kasar, sané macétak tebal tur séndéh ring sor.

- 1) Madak ba pang *bangka polonné*.
- 2) Nyén kadén *ngamah* béné telah?
- 3) *Cicing* Ih, *delikang* matan ibané!
- 4) Nyén kadén *nidik* buah gedangé kanti telah?
- 5) Yen won atiné *pedemang* ibané!
- 6) Kema *amahang* awaké nasi malu di paon!
- 7) Apa *not Iba* ah? Dado Iba nengéng nepukin Aké?
- 8) *Keléng* apa Iba. Magaé amonto gén sing maunduka.

Kruna-kruna sakadi (*bangka, plolonne, ngamah, peta, cicing, delikang, nidik, pedemang*) ba duur, makasami conto kruna kasar. Uratiang Conto Kruna kasar tiosan ring sor puniki!

No.	Kr.Andap	Kr.Kasar	Kr. BI-nya
1	mati	bangka	mati
2	daar	amah, titik,	pakani
3	icang, iang	aké	aku
4	cai/nyai	iba	kau
5	sirep	medem. pules	tidur
6	wareg	betek	kenyang
7	cangkem	bungut	mulut
8	tingalin	tolih, not	lihat
9	nepukin	ngenot	melihat
10	anak, jatma	jelema	orang

Conto kruna kasar tiosan ring lengkara puniki.

- 1) Dasar Nyai *jelema* bangsat.
- 2) Ih, nyen petang iba *bangsat*?

- 3) Peta gén *bungut* ibané. Nyen celek ké *matan* ibané nyen.
- 4) Suwud *ngléklék* suba betek basangné, pragat *pules* dogén.
- 5) Depang keto, pang *bangka* ndasn!
- 6) Ah, ia mula dasar jleman *layah mata*.
- 7) Nah, liunang *bungut Ibané mapeta* ditu! Cang sing kober.
- 8) Ih *nas liak* ih, ngudiang klian *lekklek iba* ah?
- 9) Delikang *matan ibané*, nyen kadén *iba aké* nah?
- 10) Yen *aké* sing madalem iba, suba bejek aké bungut ibané.

2.3 Nyantenang Anggah-ungguh Kruna

Sajeroning tabel ring sor puniki kaunggahang anggah-ungguh makudang-kudang kruna pinaka conto.

No.	Andap	Asi	Aso	Ami	Ama
(1)	(2)	(3)	(4)	(5)	(6)
1	aba	bakta	buat	-	-
2	adan	peséngan	wasta	-	-
3	adan	parab	wasta	-	-
4	ajap	-	-	apti	-
5	alih	-	-	rereh	-
6	anteng	-	-	jemet	-
7	awak	angga	déwék	-	-
8	baan	olih	antuk	-	-
9	baang	icén	wéhin/aturin	-	-
10	basang	weteng	waduk	-	-
11	bareng	-	-	sareng	-
12	batis	cokor	buntut	-	-
13	bedak	kasatan	bedak	-	-
14	beling	mobot	abot	-	-
15	cai/nyai	ratu/gusti /cokorda	madé/memé /bapa	ida-dané	atu, tu
16	daar	rayunang	ajeng/teda	ajengang	ajeng
17	demen	seneng	garjita	subagia	-
18	didian	ngraga	néwék	-	-
19	dingeh	pireng	piragi	-	-
20	dot	pisereng	meled	-	-

21	enceh	warih	panyuh	-	-
22	enyak	arsa/kayun	misadia	-	nyadia
23	entut	-	-	ampru	-
24	élah	-	-	dangan	-
25	énggal	-	-	gelis	-
26	galang	-	-	jenar	-
27	gedeg	duka	-	-	-
28	gedeg	menggah	-	-	-
29	gelah	drué/dué	derbé	-	-
30	gelem	sungkan	sengkaon	-	-
31	goba	warna	rupa	rupa	-
32	ia	ida/dané	ipun	-	-
33	icang iang	gelah nira	titiang	-	tiang
34	idih	edih/arsang	tunas/lungsur	-	-
35	idup	nyeneng	urip	maurip	-
36	jejeh	-	-	ajerih	-
37	jemak	-	-	ambil	-
38	jit	silit	jit	-	-
39	jriji	huli	jriji	-	-
40	kadén	sungguh	manahin	-	-

Malarapan imba anggah-ungguh kruna ba duur prasida kategesang, saluir kruna andap pastika maderbé wangun alus. Wangun alusé punika taler matios-tiosan. Kruna alus singgih wantah dados kanggén maosang utawi matur ring sang singgih, kruna alus sor kanggén matur utawi majarang sang sor, kruna alus mider dados kanggén ring lengkara Asi miwah Aso, raris kruna alus madia wantah dados kanggén ri kala mabaos matiang-jero ring sang sané durung kauningin (durung saling kenalin). Sajaba punika, élingang pisan, kruna sané ngranjing ring alus mider, janten nénten maderbé wangun Asi miwah Aso. Taler kruna Asi miwah Aso, arang pisan mederbé wangun Ami miwah Ama.

2.5 Soal Latihan Anggah-Ungguh Kruna

Indayang cawis soal-soal ring sor antuk nagingin tanda silang (X) huruf cawisan sané pinih patut! Puniki becik kanggén nguji kawagedan druéné sasampun ngwacén tata titi mabaos ba duur.

1. Sané mawinan wénten anggah-ungguhing basa Bali, duaning wénten
 - a. pabinayan linggih b. kasta
 - c. wangsa jaba d. triwangsa e. prakanggé

2. Manut J Kérsten, tingkat-tingkatan basa Baliné kabaos
 - a. sor singgih basa b. warna-warna bhs Bali
 - c. unda usuk basa d. undag-undagan basa
 - e. anggah-ungguh basa

3. Tingkat-tingkatan basa Baliné, mangkin kawastanin
 - a. sor singgih basa b. warna-warna bahasa
 - c. unda usuk basa d. undag-undagan basa
 - e. anggah-ungguh basa

4. Triwangsa ri kala mabaos ring wangsa jaba kangkat mabaos....
 - a. alus b. andap
 - c. kasar d. andap/madia e. madia

5. Wangsa Jaba ri kala matur ring sang Tri Wangsa patut mabasa
 - a. alus b. andap
 - c. mider d. madia e. kasar

6. Bapak Kepala Sekolah . . . murid-muridé piteket mangda mikukuhin disiplin.
 - a. memberi b. ngemaang
 - c. ngicénin d. ngaturin e. ngwéhin

7. Titiang sané sampun . . . suraté punika ring Bapak Bupati.

- a. memberi b. ngemaang
 c. ngicén d. ngaturang e. ngwéhin
8. Ipun sampun dibi . . . jinah antuk bapanipuné.
 a. enjuhina b. baanga
 c. wéhina d. kaicén e. aturina
9. Ida cokorda sampun kocap mireng orti, nanging bapan
 titiangé durung
 a. ningeh b. miring
 b. mendengar d. maderbé e. miragi
10. Ning, jemakang dadong tungked tekén pabuan!
 Kruna *tungked* alusnyané
 a. pawiduhan b. pacanangan
 c. lanjutan d. teteken e. sungklit
11. Ratu, titiang mapamit riinan, bawin titiangé durung
 a. maem b. ngamah
 c. madaar d. neda e. ngajeng
12. Ampura Ratu, kurenan titiangé nénten sida tangkil, ipun
 kantong . . . ageng.
 a. beling b. gering
 c. mobot d. abot e. robot
13. Bapan titiang . . . adin titiangé jinah ayuta rupiah.
 a. ngemaang b. ngicen
 c. ngaturin d. memberi e. ngwéhin

14. I Madé, ri kala matur ring Ida Ayu patut nganggén
- a. basa andap b. basa alus mider
 c. basa alus d. basa madia e. basa kasar
15. Ratu Ida Aji, Ratu sampun . . . orti?
- a. ningeh b. mireng
 c. miragi d. ngarsayang e. manggihin
16. Titiang wawu dibi . . . saking Jawi.
- a. tiba b. teka
 c. rauh d. mantuk e. datang
17. Yéning manut . . . titiangé, becikan Iratu sané rauh merika!
- a. keneh b. pikayunan
 c. pikarsan d. kayun e. manah
19. Anaké sané katinggal padem antuk mémé bapannyané
 kawastanin anak
- a. ngubuh b. yatim
 c. ubuh d. sengsara e. sukerta
20. "Uli cerik ia ngata-ngata awak, ngalih dedaaran uli rahayu".
 Ngata-ngata awak tegesnyané sajeroning basa alus
- a. ngidup ngidupang iba b. ngurip-nguripang dewek
 c. nguluk-nguluk awak d. ngutang-ngutang dewek
21. Kruna "awak" ngranjing sorohing kruna
- a. kasar b. andap
 c. mider d. alus madia e. alus sor

BAB IV

P A M U P U T

4.1 Pacutetan

Basa Baliné silih tunggil basa daerahé ring Indonesia sané rauh mangkin kanton urip tur kanggén pinaka srana magenduh- wirasa (*alat komunikasi*) antuk krama Baliné. Duaning asapunika basa Baliné patut kaupapira becik-becik mangda tetap rajeg lan werdi kantos ka wekas.

Sakantun wénten adat ring Bali, sakantun jagat Baliné pinaka daérah tetujon wisata, miwah sakantun jagat Baliné ngumandelang séktor pariwisata budaya, basa lan susastra Baliné tetap pacang kaperihang pinaka akahipun. Yéning akahé nénten kaupapira becik-becik, janten pacang nénten metu sekar miwah woh. Tegesipun yéning basa, aksara, lan susastra Baliné kalaliang, mapuara pacang rered budaya Baliné, rered taler pariwisata Baliné. Duaning basa Baliné kari manggéh pinaka srana mabebaosan sesamén krama Bali, bilih-bilih akéh kanggén ring indik pakaryan adat miwah agama Hindu, krama Baliné sané sampun ngranjing kahuripan grahasta asrama saha manados krama désa adat, mangda waged mabaos basa Bali alus. Antuk punika aji kaweruhan indik mabaos Bali manut anggah-ungguh basa, patut kaplajahin becik-becik antuk krama Baliné.

Kawéntenan krama Baliné sané mawit saking terehan tri wangsa (sang singgih) miwah wangsa jaba (sang sor), puniki pinaka wiwilan krama Baliné patut mabaos manut tata anggah-ungguh basa sané manut utawi patut. Krama wangsa jaba patut mabaos alus ring krama tri wangsa. Krama tri wangsa kangkat mabasa andap utawi madia ring sang sor (krama wangsa jaba). Puniki sampun risaksat uger-uger utawi tatakrama mabaos Bali.

Sajaba punika, ring pakraman anyar (modern), sasampun krama Baliné maderbé linggih matios-tiosan, metu raris krama prakanggé (sang singgih), miwah parajana (sang sor). Parajana ri kala mabaos ring prakanggé kabaos matur, mawinan patut mabasa alus

(nyinggihang), sawaliknyané prakanggé pinaka (sang singgih), kangkat mabasa andap utawi madia ring parajana (sang sor).

Malarapan papaosan ba duur prasida kacutetang mungguing sané mawinan rauh mangkin ring Bali kantun manggéh tata anggah ungguhing basa, riantuk wénten pabinayan linggih (*perbedaan status sosial*) krama Baliné. Maiketan ring puniki, ring Bali wénten basa pakraman (basa sané kanggén ring patemon-patemon resmi) miwah basa pasuitrayan (basa Baliné sané kanggén mabaos sarahina-rahina ring paambyaran).

Malarapan wirasan lengkara, anggah-ungguh lengkara basa Baliné wénten 6 soroh, luiripun: (1) lengkara alus singgih, (2) lengkara alus sor, (3) lengkara alus mider, (4) lengkara alus madia, (5) lengkara andap, miwah (6) lengkara kasar.

Raris malarapan wirasan basa, anggah-ungguh basa Baliné kapah dados patang soroh, luiripun: (1) basa kasar (basa kasar pisan miwah basa kasar jabag); (2) basa andap; (3) basa madia; miwah (4) basa alus (Asi, Aso, Ami).

4.2 Pangapti

Nguratiang pacutetan ba duur, patut wénten rasa wirang ring kawéntenan basa lan susastra Baliné. Manut pamiteges Pasal 36, Bab XV Undang-undang Dasar 45, basa Baliné patut kaupapira mangda tetap rajeg pinaka panyangga kabudayan Bali lan nasional. Irika kajantenang mungguing basa-basa daérah sané kantun urip tur kapiara antuk kramannyané kaupapira antuk panegara.

Malarapan atur titiangé ba duur, pangaptin titiang ring sang maraga guru wisésa miwah krama Baliné kadi asapuniki.

- 1) Sané patut ngrajegang basa, aksara, lan sastra Baliné wantah iraga (i krama Bali) sareng sami. Pemerintah kaptiang mangda sumeken mikayunin indik profesionalis guru-guru basa Baliné;
- 2) Indik pasemayan Bapak Mangku Madé Pastika jagi ngangkat penyuluh basa Bali lan agama Hindu ring suang-suang désa adat sajabag Bali, mangda kajantenang
- 3) Daging pasal Pergub Bali No. 20 warsa 2013 indik Wali kota/Bupati kapatut ngangkat guru-guru basa Bali mangda kajantenang. Pemerintah mangda urati

riantuk sampun akéh wénten sarjana pendidikan basa daerah Bali sané sayaga nanging durung polih genah ngajahin.

- 4) Suang-suang sekolah dasar patut kadagingin guru-guru basa Bali mangda nénten guru agama lan guru kelasé kapaksa ngajahin basa Bali.
- 5) Sekolah SMP/SMA/SMK sané kantun ngicénin guru Agama Hindu ngajahin bidang studi Basa Bali mangda nunas guru basa Bali ka bupati/walikota mangda sarjana basa Baliné polih genah makarya ngrajegang budaya.
- 6) Mantuk ring krama Baliné, utaminé ibuk-ibuk mangda sampunang nglaliang basa ibu. Sakantun alit-alité ring kulawarga mangda kariinin antuk ngajahin basa Bali, sampunang uju-uju ajahina mabasa nasional. Indik jagi mabasa Indonesia, otomatios kamolihang ngawit anaké alit masuk TK.
- 7) Krama Baliné sané dados prajuru adat utawi juru baos ring adat lan agama mangda kayun jemet malajahang angga mangda sayan waged mabaos Bali, sampunang campahina basa Bali pakramané antuk basa gado-gado.
- 8) Paican Pemda Bali indik dana pasraman nyabran warsa, mangda taler kanggén ngwéhin tuntunan mabasa Bali. Titiang sayaga manados narawakia ngaturang tuntunan.
- 9) Dinas Pendidikan Pemuda lan Olahraga sajabag Bali mangda urati ring kualitas buku-buku palajahan Basa Bali. Indik daging kaweruhané sayan jangkep, tata sasuratané mangda patut manut ejaan Bali Latin utawi pasang aksara Bali, taler basannyané mangda nganutin tata anggah-ungguh basa sané patut.
- 10) Indik lomba nyastra Bali ring Porsenidés, Porsenicam, PSR, PSP, Porsenijar, PKB, Utsawa Dharmagita, miwah ring unstansi tiosan ring panyangran ulang tahun, mangda tetap karajegang tur kalimbakang malih mangda basa, aksara, lan susastra Baliné tetep rajeg.

DAFTAR PUSTAKA

- Antara, I Gede Nala. 2007. "Téknik Berpidato dalam Bahasa Bali" Makalah Disampaikan di dalam Lokakarya Guru-guru Bahasa Bali Se-Kota Denpasar.
- Bagus, I Gusti Ngurhh. 1978. *Kembang Rampé Kasusastraan Bali Anyar Buku II* Denpasar: Yayasan Saba Sastra Bali
- Dinas Pendidikan Provinsi Bali. 2006. *Kurikulum Muatan Lokal Bahasa Daerah Bali untuk SMA/SMK*. Denpasar.
- Kérsten, J., S.V.D. 1974. *Tata Bahasa Bali dan Kamus Bahasa Bali Lumrah*. Jakarta: Balai Pustaka.
- Naryana, Ida Bagus Udara. 1983. "Anggah-ungguhing Basa Bali dan Peranannya Sebagai Alat Komunikasi Bagi Masyarakat Suku Bali." (Skripsi). Denpasar: FS, Unud.
- Suasta, Ida Bagus Madé. "Sistem Tingkat-tingkatan Bicara Bahasa Bali" Makalah disampaikan pada Kongres Bahasa Bali Ke-5. Denpasar: Dinas Kebudayaan Privinsi Bali.
- Suwija, I Nyoman. 2007. *Pupulan Pidarta Basa Bali Alus*. Denpasar: Pelawa Sari.
- Suwija, I Nyoman. 2008. *Kamus Anggah-ungguhing Basa Bali*. Denpasar: Pelawa Sari.
- Tarigan, Henry Guntur. 1986. *Berbicara Suatu Keterampilan Berbahasa*. Bandung: Angkasa.
- Tim Penyusun Naskah Pelajaran Bahasa Bali. 1997. *Widia Basita I, II, & III*. Denpasar: Upada Sastra.
- Tim Penyusunan Buku Penyusunan Aksara, Sastra dan Bahasa Bali. 2002. *Imba Mabaosan Nganggén Basa Bali*. Denpasar: Dinas Kebudayaan Provinsi Bali.
- Tim Penyusun Kamus Pusat Bahasa. 2000. *Kamus Besar Bahasa Indonesia*. Jakarta: Balai Pustaka.
- Tinggen, I Ngh. 1989. *Sor Singgih Basa Bali*. Singaraja: Indrajaya.

